



30. april 2024

UPA2024/96

Inatsisartut aalajangiiffigisassaattut siunnersuut, Naalackersuisut peqquneqassasut nalunaarusioqqullugit, utoqqaat immikkut nappaataat tarnikkullu nappaatigisinnaasaannut akimut suleqatigiinnik pilersitsinerup pitsaaqutaanik ajoqutaanillu nalunaarusiornissamik. Nalunaarusiattaq qulaajassavaa aningaasaatigut allaffissornikkullu pisortanut kingunissai suliaasaqarfiit akimorlugit utoqqarnut immikkut ittumik nappaatinut tarnikkullu nappaatilinnut suleqatigeeqalernissamut. Nalunaarusiaq UPA 2025 nallertinnagu Inatsisartunut agguanneqareersimassaaq

(Inatsisartunut ilaasortaq Anna Wangenheim, Demokraatit)

Inatsisartuni ilaasortaq Anna Wangenheim Demokraatineersup siunnersuutaa pillugu Siumumiik imaattumik oqaaseqaateqassaagut.

Aallarniutigalugu oqaatigissuarput pinaveersaartitsineq paasisitsiniaanerlu salliutinneqartuartaqarmat.

Puigortunngorneq ilaqutariissutsimi kingornuttangaasinnaavoq aammali inuunerup ilaani imminut paarinnginneq tunngaviulluni puigortunngorneq pilersinnaalluni. Taamatut oqareerluta Siumumi isumaqarpugut puigortunngortunik sullissineq annertuumik pitsanngorsartariaqartoq.

Isumaqataavugut sumiiffinni puigortunngortut immikkoortortaqqarfartariaqarmata, taamaattumik Naalackersuisut tamanna anguniarlugu suliaq aallarereersimamassuk nuannaarutigaarput. Puigortunngortut immikkut inissisimaannaratik kisianni taakkununga sullissinissamut ilisimasalinnik aamma sulisoqartariaqarput kialluunniimmi takorloorsinnaavaa puigortunngortunik sullississagaanni oqimaassinnaasoq ilisimasassallu pingaarutillit pisariaqarluinnartut, tassa sullissisunut ilaqutaasunullu. Taamaattumik ilisimasanik annertusaaneq ilinniartitseqqinnerli avaqqunneqarsinnaanngillat aammattaaq puigortunngortunut sullissinermi ilaqutaasunullu ilitsersuummik Naalackersuisut suliaqarnerat Siumumiik iluarisimaarlugu oqaatigissavarput.

Tamatta ilisimavarput utoqqarni sulisussaaleqineq kommunini tamani annertuumik ajornartorsiutaasoq soorluttaaq puigortunngortuni tamanna ajornartorsiutaavoq, qaffasissumik



ilinniagaqarpata ilinniarsimangippataluunniit. Tamanna aamma Aningaasaqarnermut siunnersuisooqatigiinni siulittuutaavoq sulisooreersut soraarninngorartussat eqqarsaatigalugit, taamaattumik Kommuneqarfik Sermersuumi utoqqarni sulisussaaleqineq qaangerniarlugu Kommunalbestyrelse aaliangernikuuvoq utoqqarni sulisut inissamik tunineqarsinnaanerannik aqutissiuussiumalluni, tassani neriuutigalugu sulisussanik tamanna kajumilersitsissasoq. Soorlu siuliani oqaatigingipput qaffasissumik ilinniarsimasut aamma amigaataasut, tamanna imatut kinguneqartarpoq eqqugaasup suussusersineqarnissaanut aallussineq killeqartarluni, ajornartorsiut tamanna qaangerniarlugu suliassagut amerlapput.

Utoqqarnik sullissinissamut ilinniarsimasut assigiinngitsut – ilinniarsimangitsunik sullinneqarnerat – ilisimasaqarnerulerlutillu pikkorinnerulernissaat – nukittorsaanissaq sinaakkusersuinissaq

Ullumikkut utoqqaat akornanni atukkat imaannaangimmata utoqqalisut arlalissuit nunatta avataanut ajoraluartumik nuuttarput toqqissisimaniarlutik. Pissutsit ilungersunartut qanoq iliorluni qaangerniarsinnaaneri eqqarsaatigalugit ilisimatuunik innersuussutigineqarpoq suliassa qarfiit akimorlugit suleqatigiinnissaq, tassani pingaartillugu utoqqaat nappaataannut ilisimasanik ilisimasaqarnerulernissaq taamaattumik Naalakkersuisut akissuteqarput suleqatigiinneq taamaattoq aallartereersoq aammalu peqqinnissaqarfik kommunillu akornanni suliassanik ersarissaasoqassasoq ataqatigiissaarinerlu sulissutigineqartoq.

Siumumi isumaqataavugut peqqinnissaqarfimmiit kommuninut nuussinermi sullissineq pitsaanerusariaqartoq, tassami akuerineqarsinnaangilaq paaqqutarisap innarlerneqartarnera tamanna pineqartumut innarliiginnarani ilaqutariinnut sunniuteqarnerluttarpoq.

Inatsisartuni ilaasortap Anna Wangenheim nalunaarusiornissamik siunnersuutaa paasilluarualarlugu Naalakkersuisut itigartitsinerat aamma paasilluarparput, tassami akissuteqaatiminni erseqqissaatigaat nalunaarusiornissaq pisariaqanngitsoq ajornartorsiutinut ilisimasat naammareermata pingaarnersuq iliuseqarnissamut nukiit atorineqarpata.

Naalakkersuisut aamma akissuteqaatiminni erseqqissaatigaat Peqqinnissaq pillugu isumalioqatigiissitarsuup inassuteqaatai piviusunngortinniarlugit Naalakkersuisut aningaasaliissuteqareertut sulinerlu aallartereeramat nalunaarusiornissaq pisariaqanngitsoq.

Siumumiik taamatut oqaaseqarluta siunnersuut ilalinngilarput.

Doris J. Jensen

Siumut